

Tur piscado ta invita pa Captain's Meeting awe diabierna dia 5 di Juli 2013

ORANJESTAD - Falta solamente algun dia mas pa dia di piscado y Centro di Pesca Hadicurari conhuntamente cu Santa Rosa, ta den pleno preparacion pa celebra e grandioso dia di piscado e biaha aki. Tur aña, dia di San Pedro cual ta dia 29 di Juni, rond Caribe piscadonan ta rindi tributo na e santo patrono di piscado. Centro di Pesca Hadicurari tur aña, manera ta e tradicion desde aña 94, ta celebra esaki cu un tremendo competencia di pesca hunto cu un dia di famia na nan centro.

CAPTAINS MEETING

Awe diabierna dia 5 di Juli, tur piscado y doño di boto ta invita pa atende e reunion di capitan, unda lo habri e inscripcion y alabes repasa e reglanan den un ambiente sumamente yen di goso di piscado pa cual Hadicurari ta conoci pe. E torneo ta conta e biaha aki atrobe cu mas di 3 mil florin na premio pa tanto categoria "open all tackle" como categoria "tradicional crioyo".

E biaha aki atrobe lo permiti, riba peticion di piscadonan y pa demostra e amistad y relacion entre piscadonan di tur distrito di Aruba, lo permiti salida for di tur centro, pero nan mester ta registra prome y tin nan "carnet". Esaki sigur lo yuda piscadonan di otro areanan spaar gasolin y encurasha nan pa participa. Tambe tur team cu inscribi prome of durante di e "captains meeting" lo ricibi e flanelnan manga largo color di seguridad riba lama di dia di piscado cortesia di Hadicurari. Inscripcion lo ta unicamente 50 florin pa boto y cu un maximo di 4 participante pa boto. P'esey percura pa awe diabierna dia 5 di Juli pa 7'or y mey en punto, capitan y tripulacion mester tey na Centro di Pesca Hadicurari.

HOPI ACTIVIDAD NA WAF CHIKITO DIADOMINGO

Riba diadomingo dia 7 di Juli venidero lo tene e celebracion di Dia di Piscado na Waf Chikito. Ademas di un torneo di pesca cu hopi premio atractivo, lo tin un festival di cuminda crioyo cu varios stand di cuminda na prijs di famia. Keri keri, pisca hasa, awa di playa, seafood mix y mucho mas. Mas cu claro e ambiente tipico di piscado, cu su musica tipico y banda musical, lo deleita un y tur henter dia. Lo tin homenahe na baluartenan

di mundo di piscamento conforme e tradicion di Hadicurari y varios sorpresa mas.

PA KICO UN DIA DI PISCADO?

Dia di piscado a keda institui pa enfoca atencion riba e

trabou di piscado, kico piscamento ta nifica pa nutricion di hende y e retonan cu piscadonan ta enfrenta. E dia ta sirbi como reflejo pero tambe celebra e ofishi di piscado. Piscamento ta parti integral di e cultura di Aruba. For di

tempo di Indjan, na Aruba tabata depende di lama y piscamento. Na excavacionnan arkeologico na entre otro Tanki Flip, a haya restonan di calco y varios especie di pisca y turtuga, indicando cu e prome habitantenan di nos

isla tabata piscado. E tradicion di piscadonan ta uno ancra den barionan di piscado manera Noord, Rancho, Savaneta, y otronan. Riba dia di piscado, ban duna piscadonan e aprecio y e reconocimiento cu nan merece. □